

В НЕДЕЛЮ 3-Я СЕДМИЦЫ ВЕЧЕРА.

На **Г**осподи воззвах, поставим стихов 10, и поем 4 стихиры Осмогласника
умилительны, гласа: и трипеснца 3,

Подобны господина Иосифа. Глас 8.

Подобен: Господи, аще и на судищи:

Господи, на Кресте волею простерл еси длани Твоя, * сему умилением сердца поклонитися и нас сподоби, * просвещенных добре постом и молитвами, * и воздержанием и благотворением, * яко Благ и Человеколюбец.

Подобен: Господи, аще и на судищи:

Господи, грехов моих множества, * по множеству очисти щедрот Твоих Всещедре, * и Крест Твой сподоби чистою душею видети, * и целовати, в настоящей седмице воздержания, * яко Человеколюбец.

Ина стихира господина Феодора глас 3.

Подобен: Велие чудо:

Велие чудо, Древо видится, * на немже Христос волею распятыя плотию: * поклоняется мир, и просвещаемъ взывает: * о Креста сило, и зримый демоны палит, * и воображаемъ сих паля является! * Ублажаю тя пречистое Древо, * почитаю и поклоняюся со страхом, * и Бога славлю, * тобою даровавшего мне жизнь безконечную.

И Миней 3. Слава, и ныне, Богородичен.

Вход. Свете тихий:

Прокимен, глас 8: Дал еси достояние боящимся Тебе Господи.

Стих: От конец земли к Тебе воззвах.

Стих: Покрыюся в крове крил Твоих.

Стих: Тако воспую имени Твоему.

На стиховне самогласен дне, дважды. Глас 8:

Воззрети очима на небо не смею окаянный аз, * от лукавых моих деяний: * но яко мытарь стена взываю Ти: * Боже, очисти мя грешнаго, * и фарисейскаго лицемерия избави мя, * яко един Благоутробен.

Стих: К Тебе возведох очи моя, Живущему на Небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

Воззрети очима на небо не смею окаянный аз, * от лукавых моих деяний: * но яко мытарь стена взываю Ти: * Боже, очисти мя грешнаго, * и фарисейскаго лицемерия избави мя, * яко един Благоутробен.

Стих: Помилуй нас, Господи, помилуй нас, яко по многу исполнихомся уничижения: * наипаче наполнися душа наша поношения гобзующих, и уничижения гордых.

Мученичен: Мученицы Господни * всякое место освящаете, * и всяк недуг врачуете: * и ныне молитесь, * избавитися сетей вражних душам нашим, молимся.

Слава, и ныне, Богородичен, глас тойже:

Небесная поют Тя, * обрадованная Мати Безвестная: * и мы славословим
неизследованное Твое Рождество, * Богородице, * моли спастися душам нашим.

В ПОНЕДЕЛЬНИК 4-Я СЕДМИЦЫ

НА УТРЕНИ ТРОИЧНЫ

По 1-м стихословии глаголем седальны умилительны Осмогласника.

По 2-м же стихословии глаголем настоящий седален,

Глас 8, господина Иосифа.

Подобен: Воскресл еси:

Всечестному вернии поклонимся Древу, * на немже Творец всех вознесся. * Предлежит освящая приступающая * душою и телом, * скверну очищая греха, * постящихся верно, и воспевающих всегда Христа, * единого Благодетеля.

Слава, тойже.

И ныне, Богородичен. Подобен:

Слово Отчее на землю сниде, * и ангел света Богородице вопияше: * радуйся Благословенная, чертог едина сохраняя, * зачатие приемшая превечнаго Бога и Господа: * да от прелести спасет яко Бог, * род человеческий.

По 3-м стихословии седален, глас 3.

Подобен: Красоте девства:

Преполовивше ныне воздержание, * и на поклонение Христе предваривше живоноснаго Твоего Креста, * припадающе вопием Ти: * велий еси Человеколюбче, * и велия дела Твоя, яко явил еси Крест Твой честный, * емуже со страхом покланяющиеся взываем: * слава крайнему благоутробию Твоему.

Слава, тойже.

И ныне, Богородичен. Подобен:

Якоже неделанная Дево лоза, * прекраснейший грозд прозябла еси, * источающий нам вино спасительное, * веселящее всех души и телеса. * Темже яко виновную Тя добрых ублажающе, * присно со ангелом вопием Ти: * радуйся Благодатная.

Канон Mineи, и настоящий трипеснец, и стихословится песнь. Глас 8.

Песнь 1.

Ирмос: Колесницегонителя фараоня погрузи, * чудотвориай иногда * моисейский жезл, крестообразно поразив, * и разделив море: * Израиля же беглеца пешеходца спасе, * песнь Богови воспевающа.

Светоносное Креста поклонение всем явися, солнечную зарю спасения испущающее, и всех озаряющее страстей омрачением одержимых: стецемся сей чисте обლობызати.

Поста очистившися благодатию, чистым умом, Чистому единому, приидите, возопиим гласом благодарения: Ты кровь Твою Слове за ны вся дал еси, Ты и Крестом освящаеши ны.

Запенся прилоги змиинными, падением ужасным всегда лежу, Спасе, падение первозданного страстию Твоею и Крестом исправивый, исправи, и настави к хотений Твоих исполнению.

Богородичен: Предстоящи Кресту Твоему Господи, Неискусобрачная, и Твоя язвы зрящи Владыко, уязвляема глаголаше: увы Мне Чадо, болезни избегши в рождестве Твоем, ныне болезненно уязвляюся.

Иный, господина Феодора. Глас 3.

Ирмос: Поим Господеви, * сотворшему дивная чудеса в Чермнем мори: * понтом бо покры противныя, * и спасе Израиля. * Тому единому поим, яко прославися.

Седмица святая сия и светоносная: Крест всечестный предлагает миру: приидите, поклонимся, страхом же и любовию души просветивше, на нем пригвоздившагося Христа в песнех славяще.

Кресту Твоему вси покланяемся Христе, предпровождение творяще Воскресения Твоего: поем гвоздия Твоя, чтим и копие Твое, устнама и очима, душею же и телом сими очищаеми.

Слава, Троичен: Троице во едином Существо пелаемая, Отче, Сыне, со Духом Святым, безначальное, присносущное, несозданное Божество, света источниче и жизни: Тебе покланяемся вси человецы, все осуществившему.

Богородичен: Поем Тя Дево Богородице Чистая, херувимскую колесницу, из неяже Бог родися: Ты бо едина была еси источник нетления, источающий всем жизнь, из негоже почерпающе исцеление приемлем.

Слава Тебе Боже наш, слава Тебе.

Четырдесятые постных стадий преполовляюще, приидите любовию со Христом идем к Божественней страсти, да сраспеншеся Ему, общницы будем Того Воскресению.

Катавасия: Поим Господеви, * сотворшему дивная чудеса в Чермнем мори: * понтом бо покры противныя, * и спасе Израиля. * Тому единому поим, яко прославися.

Песнь 8.

Ирмос: Седмерицею пещь халдейский мучитель * богочестивым неистовно разжже, * силою же лучшею спасены сия видево, * Творцу и Избавителю вопияше: * отроцы благословите, * священницы воспойте, * людие превозносите во вся веки.

Ядовитыми страстьми и душу и мысль уязвлену стяжавшаго, Господи помилуй, ущедрит Твоим Крестом. Защити и от ребр Твоих излиянными каплями, да усердно пою: священницы благословите, людие превозносите во вся веки.

На горе древле тебе Моисей прообрази, руце возвысив, и Амалика побеждая, Кресте всечестный, емуже кланяющеся днешь, побеждаем демонов иноплеменные полки, и верую поем: священницы благословите, людие превозносите во вся веки.

Страстьми преклонена, враги запинаема, обычаем лукавым влекома, ущедрит Благоутробне, Твоим Крестом защити, яко да пою неуклонным сердцем: отроцы благословите, священницы воспойте, людие превозносите во вся веки.

Богородичен: Болезненно стениящи, матерски восклицающыи, и от внутренних

скорби не терпящи, на Крест взирала еси к Рожденному из Твоего чрева, Чадо, вопиючи, что видение сие? како страждещи, естеством безстрастный, всяко хотя род человеческий от тли свободити?

Иный.

Ирмос: Ангельми немолчно в вышних славимаго Бога, * небеса небес, земля, и горы, * и холми, и глубина, и весь род человеческий, * песньми Того яко Создателя, * и Избавителя благословите, * и превозносите во вся веки.

В церкви предложенный Крест Христов видяще, страхом и верою братие пришедше поклонимся, Тому вопиюще: Ты жизнь процвел еси человеком светоносе.

Победоносна в бранех, небо ты показа животворный нам Кресте, оружие непобедимое, врагом низложение, Церквам рог, и верным спасение.

Благословим Отца, и Сына, и Святаго Духа, Господа.

Троичен: Отца Святаго славлю, и Сына Святаго чту, и Духа Святаго пою, единосущную Троицу простую, Бога коегождо Сих, Светы и Свет, яко от солнца единого происходяща.

Богородичен: Радуйся двере непроходимая: радуйся купино неопалимая: радуйся ручко золотая: радуйся горо несекомая: радуйся Богородице, упование нерушимое, и стено на Тя надеющимся.

Слава Тебе Боже наш, слава Тебе.

Пост преполовивше, дерзаим духом на грядущее юношески, благотекуще с Богом братие, яко да и Пасху радостно узрим Христу воскресшу.

Хвалим, благословим, покланяемся Господеви, поюще и превозносяще во вся веки.

Катавасия: Ангельми немолчно в вышних славимаго Бога, * небеса небес, земля, и горы, * и холми, и глубина, и весь род человеческий, * песньми Того яко Создателя, * и Избавителя благословите, * и превозносите во вся веки.

Песнь 9.

Ирмос: Устрашися всяк:

Внучата древле Иаков благословляя, проображаше светло Крест честный, имже Щедре нас благослови, освящения подательную благодать подая покланяющимся ему и всех Избавителя Тя прославляющим.

Пощения водою вернии очистившися, и душею и мыслию, животодательное и божественное Древо облобызаим: предлежит бо яве всем, источая божественное оставление, и свет небесный, и жизнь, и истинное радование.

Судию Тя вем страшна, грядуща во славе Божества, всех сокровенная обличити тогда хотяща Господи. Темже Тебе зову Блаже: согреших, прости, не обличи моя многая и лютая согрешения.

Богородичен: Агница древле Агница зрящи на Кресте пригвождена, и омрачаему солнечному сиянию, плачуци глаголаше: Солнце славы Иисусе, зашел

еси умерщвляемь: но возсияй востания свет любящим Тя.

Иный.

Ирмос: На Синайстей горе, виде Тя в купине Моисей, * неопально огонь Божества заченшую во чреве: * Даниил же Тя виде гору несекому: * жезл прозябший, * Исаиа взываше, * от корене Давидова.

На месте, идеже нозе стоясте [Тебе] Владыки и Бога, поклонимся вси днесь Кресту всечестному, якоже Давид взывает богогласнейший: ибо вся содержай горстию, на сем вознесся.

На земли живущии приступите, постом чистии, и предлежащий видяще днесь всечестный Крест, поклонитесь страхом и верою, веселитесь и срадуйтесь, освящение душам почерпающе.

Троичен: Существом Единица есть несекома, Пребожественная Троица, соединяема Естеством, делится Лицы свойственно: несекома бо сечется, едино сущи троится. Сия Отец есть, Сын, и Дух Живый, соблюдающая все.

Богородичен: Детородную деву кто слыша? и мать без мужа? Марие, совершаеши чудо: но скажи ми, како? Не испытай глубины Богорождения Моего. Сие всеистинное, паче человеческого ума постижение.

Слава Тебе Боже наш, слава Тебе.

Благодарную хвалу принесем Богу вси людие, яко видяще ныне обლობызаем всесвятый Крест. Разумейте убо и покарайтесь в сем демони: языцы варварстии разумейте, и покарайтесь, имже с нами Бог.

Катавасиа: На Синайстей горе, виде Тя в купине Моисей, * неопально огонь Божества заченшую во чреве: * Даниил же Тя виде гору несекому: * жезл прозябший, * Исаиа взываше, * от корене Давидова.

Светилен гласа.

На стиховне самогласен, дважды, глас 6:

Изрядный путь возношения Христе, * смирение показал еси, * Сам Себе истоцив, * и зрак раба приим: * фарисеа велехвальныя молитвы не послушав, * мытаря же сокрушенное стенание, * яко жертву непорочную в вышних прием. * Темже и аз вопию Ти: * очисти Боже, очисти Спасе мой, и спаси мя.

Стих: Исполнихомся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Изрядный путь возношения Христе, * смирение показал еси, * Сам Себе истоцив, * и зрак раба приим: * фарисеа велехвальныя молитвы не послушав, * мытаря же сокрушенное стенание, * яко жертву непорочную в вышних прием. * Темже и аз вопию Ти: * очисти Боже, очисти Спасе мой, и спаси мя.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Господи, в память святых Твоих * вся тварь празднует, * небеса радуются со ангелы, * и земля веселится с человеки. * Тех молитвами * помилуй нас.

Слава, и ныне, глас тойже:

Архангельское слово прияла еси, * и херувимский престол показала еси, * и на объятиих Твоих носила еси Богородице, * надежду душ наших.

На первом часе творим поклонение честному Кресту якоже и в Неделю, по написанному образу, поюще вместо, Стопы моя: Кресту Твоему поклоняемся Владыко: На часех же по Отче наш: Кондак: Не ктому пламенное оружие:

Кондак, глас 7.

Не ктому= пла=менное ору=жие* храни=т врат Еде=мских:* на ты=я бо на=йде пресла=вный соу=з дре=во кре=стное,* сме=ртное жа=ло, и а=дова побе=да прогна=ся.* Предста=л бо еси=, Спа=се мой,* вопия= су=щим во а=де:\ вни=дите па=ки в рай.

Такожде и в среду и пяток, четыре сия дни: в пяток же сохраняем Крест якоже тамо положися.

НА 6-М ЧАСЕ

Тропарь Пророчества, Глас 7:

Господи, да не яростию Твоею * обличиши люди согрешившия, * ниже гневом Твоим накажеша нас Благ сый: * Тебе бо славит вся земля, и молимся, * пощади нас Святыи.

Прокимен, псалом 61, глас 6: О Боже спасение мое, и слава моя.

Стих: Не Богу ли повинется душа моя?

Пророчества Исаиина чтение. [Глава 14, ст. 24 – 32.]

Тако глаголет Господь Саваоф: якоже глаголах, тако будет, и якоже совещах, тако пребудет: Еже погубити ассириан на земли Моей, и на горах Моих: и будут в попроание, и отыметя от них ярем их, и слава их от рамен их отыметя. Сей совет, егоже совеща Господь на всю вселенную, и сия рука на вся языки вселенныя. Яже бо Бог Святыи совеща, кто разорит? и руку Его высокую кто отвратит? В лето, в неже умре Ахаз царь, бысть глагол сей: Не радуйтеся вси иноплеменницы, сокрушися бо ярем биющаго вы: от семене бо змиина изыдут исчадия аспидов, и исчадия их изыдут змии парящии. И упасутся убозии им: нищии же человецы в мире почиют: и потребит голодом семя твое, и останок твой избьет. Восплачутся врата градов, да возопиют грады смятеннии, иноплеменницы вси: зане дым от севера идет, и несть, иже пребудет. И что отвещают царие языков, яко Господь основа Сиона, и Тем спасутся смиреннии людей Его.

Прокимен, псалом 62, глас 4: Тако благословлю Тя в животе моем.

Стих: Боже Боже мой, к Тебе утреннюю, возжада Тебе душа моя.